



通諭賀縣荔浦兩邑士民示

康熙三十九年四月

賀荔兩縣已除害矣今畧舉一二發牌八面懸掛會城譙樓下左爲貪婪酷虐者覆車示鑒發牌四面懸掛會城譙樓右爲橫徵苛派者覆車示鑒昔人懲一儆百本院一卽再各自猛省毋致至三特示

一示賀縣里民知諭知縣到任三月卽派七甲現當里民銀叁千兩又於七甲內照米再派

公費銀壹千叁百兩藉名買行均平實收銀
壹千肆拾兩又於八甲九甲十甲派銀壹千
伍拾兩通計一年零三箇月私派銀柒千伍
百玖拾兩本都院於去年九月十七日到任
後自秋至冬喻知縣尚敢印簿徵收愍不畏
死一經覺發通縣僉訴內有里民張奇獻列
名卽設局誣陷捏詳先制似此狠如虎狼毒
如蛇蝎若復稍縱則無所不噬已經會疏

題叅矣除檄行藩臬兩司通飭各屬以人爲鑒爾
賀縣士民應知罄竹難書本都院揭其尤甚
非惡惡欲其短也

一示賀縣被害生員毛振翔知該生剝膚受害
所告七里當差喻知縣每石米派銀伍兩買
行均平喻知縣每石米派銀貳兩貳錢悉與
里民所供同若楊錦因買行均平代人向孝
廉毛振翔借銀肆拾伍兩出名作保非酬謝

孝廉也該生所告涉虛姑免究毛孝廉速歸
肄業餘人俱行值季廳黃通判放歸力田毋
悞

一示賀縣士民知喻兆紳贓欸纍纍貪污最甚
已經會疏

題叅牌行按察司摘印并行布政司選擇賢員另
委矣除楊錦陳天相甘存通毛催梁衍素蔣
明紀六名收禁外欸証袁膺善蘇觀化黃金

聚冀有龍肆名取保在外候

旨聽訊其餘告証士民人等速卽回籍可也

一示荔浦縣里民知據陳葉知縣背

旨橫徵逢

蠲加派多收積穀盜賣瓜分發錢採買短價加收天
平違例斗斛淋尖編審修城借公科歛聽訟
惟財枉法致死蓋貪酷中之尤者也一一取
供後發桂同知查報另有匍愬紛紛當堂親

訊約批數紙并發桂同知詳解在案本都院
覆加研訊摘其最甚會疏

題叅若槩開列恐瀆

聖明且欵蹟多與各屬同所謂不忍下流同歸一夫
隅泣是也各屬顧影問心毋曰莫予視毋曰
莫予指十目所視十手所指其嚴乎已行藩
臬兩司通飭取具遵依備案自今官自盡職
民當守已拭目額手跂予望之

一示荔浦縣士民知葉知縣杖斃朱明舉一欵
通縣同忿共証因同日被責之徐壽昌供吐
瞻顧徐氏兩次當堂指詬呼天搶地起噬其
肉羣手力解真情迫切倘日後庭鞫彼婦必
有不願俱生之勢姑舍壽昌非遺漏也本都
院在在悲憫類此夫言之諄諄而聽之藐藐
不畏天不畏人奇貪異酷愍不畏死此厥不
除養癰流毒縱虎歸山而欲其不剝膚不噬

人能乎爾各屬知否

一示荔浦難民張奇獻等知此案貪酷吏與無知奸民通同設計陷人酷吏心狠手毒於此而惡貫盈矣奸民張世燦父子欵留奇獻住宿茶酒復飯飯後就枕伺其熟睡燦以持刀謀殺報縣縣官以持刀謀殺立拘保約族人以持刀謀殺幫証不思正月初八日在未開印時也二更則城門下鑰矣呼而入入而直

進邑署進而無留滯縣官卽升坐升坐卽出票傳差差出而縣官秉燭以待據詳亥時稟而子時拏獲世燦并其姪丁生短刀一把解送取供非謀先定而神速若此乎本都院親訊解役拘時奇獻叔姪尚在睡鄉世有持刀入室殺人尚於其家飲酒飽飯啜茶安然鼾鼻者乎知縣葉之莘恨奇獻條陳列欵有名作此先發制人嚇箝衆口捏詳到院陷人而

適以自陷也查康熙三十五年該縣指稱世
燦姦嫂送監不問責比四次拷勒銀壹百貳
拾兩卽行釋放事經五載尚敢於詳內叙及
罰銀捌拾兩購田養士士甘受巖乎虛妄至
此此真自寫供招天奪其聰閱詳眦裂其他
貪酷種種多出劣貢朱天寧助惡值季廳細
訊情形如繪與本都院先後訊供無異民之
父母殘忍維何甚已經會疏

題叅矣除張洪傑黃世昌何天寵張明秀張世弼
唐玉蔣能行司發禁外張世燦年老行司取
保候

旨餘人從寬姑貸仰值季廳梧通判立卽省釋報查
繳

一示荔浦縣孀婦姚氏知爾子姚老二偷盜韋
思成牛猪拒捕果真亦竊盜類耳滿責四十
枷斃則非依法決打邂逅致死勿論可比荔

浦縣於大盜則隱諱不肯拏於小盜則決打
不如法顛倒任性大率類此已於別案會疏
題叅矣姚氏年老痛子聞此可無憾且撞人爲盜
喪命父母失教亦不可不自悔也已經批發
平樂府銷案速卽回家毋得瀆擾

一示荔浦縣民韋士雄白晚富等知悉爾青鄉
里十甲惟有四甲正供外有水脚之派劣貢
朱天寧聳縣派爾從來無例之八甲每石米
餽銀壹兩貳錢共叁拾陸兩免派水脚自應
追究今知縣朱天寧已于別案會疏

題叅矣爾等詞內所稱包嚼事小成例事大俟署
印到日飭行立案遵照舊例免派以甦民困
呂士俊過付受贓壹兩貳錢審無証據免追
已行桂同知傳諭爾民速回力農可也

一示荔浦民李月義等知據供蔗柞賠稅又每
柞加索銀肆兩俱已退還已批按察司着爾

等速回務農可也葉之莘若早回頭豈至此
昨開每石米今年照舊公務三錢六分又開
五里新派戶房五名工食歲費里民六兩新
派櫃頭五名亦費里民六十兩加派之心不
肯少改已經本都院會疏

題叅卽日署員至書曰人無於水鹽當於人鹽
一示荔浦縣民韋士英知縣官遇事生風家丁
尋事獻芹蠹役過付染指真斯民無所措手

足之日也本都院少加詰問和盤托出但事
犯在康熙三十四年歷時已久又康熙三十
六年恭逢

恩赦韋士英係按察使衙門舊胥非愚非駭訴冤何
遲此事若追既往則訟庭無寧日矣且葉知
縣已經本都院會疏以貪酷殃民

題叅爾等亦可無憾時當農忙爾原被証佐已行
桂同知傳諭銷案回家可也

一示荔浦縣民莫扶祖知爾兄莫扶厄慘被葉
知縣酷責監斃據葉知縣親供拷打是實原
差劉貴親供監斃果真是死於杖死於獄矣
該縣枉斷莫文榮出燒埋銀壹拾捌兩箝爾
之口蠹役唐秀又奪去陸兩荔邑之民何罪
何辜本都院仰天疾首已經列欵會疏以貪
酷

題叅矣除要犯收禁取保外餘人已行桂同知查
明釋放報查其斷埋銀兩應俟奉

旨後追給以慰幽魂

一示荔浦縣士民知葉知縣居官貪酷贓欵確
據已經會疏

題叅牌行按察司摘印并行布政司選擇賢員另
委矣除金昇朱天寧唐貴姚明周士星詹逸
堯劉貴唐秀唐玉蔣能韋老二張洪傑等十
一名行司收禁外欵証徐氏何呈清魏志隆

黃士成黃士昌韋勝誥韋積賢莫扶報莫志
榮莫扶祖張奇獻何天龍張明秀張世弼等
一十四名與洪傑之父世燦年老一并行司
取保候

旨聽訊其餘告証士民人等速卽回籍可也

發落賀邑申解閩人喻三奇示

康熙三十九年八月

爲曉示通知事本都院念念敬天民視民聽從
不寄耳目於人人心之不同也如其面所以先
蒙

聖主特擢刑工兩垣外絕私交凡地方休戚官吏清
濁但採輿論亦嘗得過半矣今奉

天子命撫粵入境病臥鎮靜坐照突據賀縣喻令批
差何秀同家丁董旺解招搖不知姓名一人到

院卽批署臨桂陳同知嚴訊供係福建興化府
莆田人姓喻名三奇算命兼醫至平樂賀城兩
日聞邑人嘖嘖盼新都院引領適櫃收錢糧日
從而往觀出至唐城守衙門前縣差擒拿急混
供私訪冀緩死須臾供狀詳文存案喻三奇暫
發收禁候本都院陞堂解赴轅門責三十板仍
發署縣枷號兩月示衆滿日再責三十板死與
不死惟其命以爲閩人入粵者鑒昔賢謂對天
弗愧聞雷不驚若膽虛則鶴唳皆兵弓影疑蛇
該令心先蕩矣又國語載厲王使巫監謗道路
以目召公曰防民之口甚於防川弗聽後流於
彘尚慎旃特示

西省鹽價湧騰示

康熙三十九年九月

爲東省商鹽壟積西省衆怨沸騰引壅則課難
完食乏而餉亦悞勢難防口情切同舟事照得
國課民食兵餉視鹽法爲通塞者也銷引通商乃
鹽院之專政澄源剔弊非巡撫所敢知然防口
久已堪虞在同舟能無過慮現今西省鹽價每
觔錢貳百文計銀伍分且不可得民間計兩而
買每兩錢拾貳文摻水和泥只有七八錢本院

衙門按日買食鹽合三四處纔得壹觔本都院
無鹽食淡何必言然如小民疾苦何本月十三
日親到東關查訊據稱斷鹽已逾半月舖商俱
無得賣現今皆係燒煉舊鹽包得些觔兩聞之
錯愕查本年八月二十九日准前任鹽院沈揭
帖內開程永和呈稱桂林府埠去年十月內有
商汪美德承充本年六月具呈告退今奉招商
永和承充桂林府屬埠商等在案相距已三月

故意遲留預擡高價不惟淡食之民衆怨呼籲
抑且奉部現撥本年鹽課支充西省本年兵餉
延今九月並無解司蠹 國殃民壅引悞餉三
者實相因也據鹽道吳叅議於本月初四日示
爲嚴禁高擡鹽價事內開桂林鹽價久經詳定
每觔價銀貳分今訪會城內外鹽價每觔高擡
至貳分五六釐不等現在密差訪拿等語夫以
本都院下車來每日食鹽足紋貳分五六釐不

等現有發出買辦簿每月壹本臨桂縣照頁鈐
印可查則是貳分五六釐壹觔經年於茲矣該
道至此出示尚云桂林每觔價貳分纔訪每觔
價湧貳分五六釐豈從前民價止貳分反勒本
都院貳分五六乎抑轅門買辦人役從前多開
欺誑乎抑該道尚在夢中於民間鹽價不聞不
見不識不知乎比及本都院出城遍查舖戶各
舖內絕顆經過鹽廠查廠內如洗立帶舊商夥

計江南人汪國蔭童泳二名回語該道隨即詣
轅謝罪請釋不思蒼梧道爲桂平梧監司以桂
林推之則平梧何堪由省會觀之則遠僻必甚
該道引罪宜矣况該道所司者驛鹽也驛不必
問鹽則通省之大男大女吾子無一不仰給於
該道者也本都院雖欲不言不行得乎查本年
八月二十一日已批桂林士民黃挺樾等公呈
內曰西省行鹽皆東省夤緣之商也官以商爲

居奇換此商卽受彼商之賂商以鹽爲行劫串
數人而出一人之名價貴則病民引壅則病
國兩病則兩受其害矣身任封疆坐視病民固
可恥旁觀病 國亦難安雖專政悉由鹽院各
有職掌不便越俎然亦嘗痛切道之矣而異棍
鑽營壟斷終無如何查從前定例桂林每鹽壹
觔價銀貳分今本都院署內食鹽每觔足紋貳
分五六釐不等不知鄉村細民以至深山窮谷

鹽價騰貴當何如本年桂林新商汪美德是何
籍貫是何人氏鹽道屢稱汪商未到比到而席
未煖六月又換宜乎西商不奪不饜也據呈瘡
弊積苦與本都院見聞無異仰驛鹽道查議徑
詳鹽院裁奪另報本都院備案見本都院身在
事外不忍坐視旁觀云爾新院初政釐剔爾等
仍自赴東省陳訴所言公則公言之毋畏毋縮
天下事惟自私與自利緘口卷舌若無半點利

心無一毫私心自可明對雷電幽質鬼神爾士
民於公呈紙尾添寫僉舉土商姓名本都院一
筆勾抹願爾士民去私去利毋聽穿鼻雖昌言
敢言可也除移咨督部院新任鹽院外合行出
示爲此示諭各子埠人等知悉家有夙鹽毋論
多寡盡數發賣如再乘機多索錢一經訪實責
四十板枷號三個月示衆毋以性命易此蠅頭
示後遠近士民靜候鹽院咨覆到日另行曉諭
仍一面令該管衙門星夜催趣新商遲三日外
運鹽不赴桂城定將該商重處想鹽院裕國愛
民恤兵之心互相關切爾民毋慮鹽絕毋患價
騰毋庸紛紛嘖嘖爲也

特獎鄉老拏賊通飭潯柳二郡示

三十九年
臘月

爲特獎鄉老實心拏賊以彰信賞事照得柳州府屬賓州貢生磨文師家被賊刦殺一案闔門一十二名口同時畢命柳州府通判王世清現署府事經月不報所以本都院有懸賞急捕不獲不休之示王世清不自悔罪反敢詳稱賊因撫院購捕甚急以致遠遁本都院嚴檄罔聞巧卸請兵所以有特叅殘忍狡詐會

題之疏兵出兩月未見一獲今准提督咨開據貴
縣山西一里鄉老韋雲承前赴行營稟稱不必
官兵前去自行擒送等語已將韋善奉韋勝廣
等拿獲送營若韋鄉老者可謂老謀遠畧不動
聲色而擒之若掇也除行按察司傳喚該鄉老
到省凡經過州縣地方給夫二名逐程送至臨
桂本都院察照前示當堂賞給銀貳拾兩以彰
信也另賞花紅酒食并查是民是獐分別照前

示免差提拔同時仍行給夫免其跋涉爾民間
見亦當勇於擒盜怯於爲盜所有現供同夥務
在必獲合并曉諭爲此示諭軍民徭獐人等知
悉速將未獲真確夥賊毋論藏匿誰鄉投奔誰
家或會拿送官或私行密首槩免從前藏投之
罪隆冬寒冷各回安業毋驚惶毋逃避露宿草
食致罹疾病有負本都院輯寧苦心地方文武
亦毋得波連無辜株害平民有一犯此軍法

國法兩不貸特示

曉諭舖戶匠役示

康熙四十年二月

為曉諭各舖戶各匠役通知事照得民間貿易
價短減則本虧官府興工廩無給則人怨怨發
於口為言虧至側目堪羞本都院自縣令而躋
開府凜凜如也今院署買辦薪米葷菜酒漿與
夫布帛紙劄筆墨及書吏房日用等項俱發足
色紋銀照民價絲毫無減食鹽每劬前價紋銀
二分五厘今價紋銀二分三厘三日一買諸凡

鹽商餽送鹽包不受差作緣也其修理衙署及
起蓋觀射正直堂鏡水亭白齋所用土木匠石
匠小工等給食給錢從無白役部民一切發價
給工俱係當堂面授與爾民相見最親當無虧
怨但恐轅門各役影射托稱買辦未發價巧爲
吞騙下情無由達今奉

命調撫粵東卽日行矣爲此示諭各舖戶各匠人等
知悉如有藉稱未發價未領價者許卽呈明本
都院先代給還然後拏究爾民毋畏毋隱特示

貴州省起程傳示

康熙三十八年閏七月

爲傳示飭知事照得黔省地瘠民窮孔道衝衢夫役苦累素所洞悉本年二月赴觀察新任沿途按站僱覓不取民夫一名并不受官夫一名官派諸民官夫亦民夫也上下相蒙欺人欺已更有一種巧偽明發官價暗收原封將無作有此州縣之不能自白於下者也又有一種貪饕擅將官價吞收入已有名無實此窮民之不能

赴訴於上者也至於中伙住宿即使出自官辦
口腹累人寧無羞惡而况供應悉出漢苗里民
充已口腹吮民脂膏不知下咽何心爲此傳諭
沿途各州縣吏役人等知悉本都院欽奉

特簡巡撫粵西因病濡滯今擇閏七月吉日自貴州
省城起程所用夫馬現價長僱送至鎮遠府凡
經過黔屬州縣地方便牌夫一名不用遇店一
切食物現價自買店租照給伺候中伙槩不收

如有胥役藉稱本都院赴任名色傳喚村庄便
牌民夫任意逗留希圖折乾以及中伙供應科
派等弊查出該吏重責四十板不貸諭到該吏
回明印官照牌文抄粘木牌一面卽豎通衢曉
諭咸知仍取具遵依印結到日報查毋得故違
特示

追回派修院署銀兩發貯府庫示

康熙四十年二月

爲院署自行捐修千金發貯府庫洗除私派曉諭通知事照得入已爲贓無諸已而後非諸人

本都院自行捐修者無諸已也溯源自上澄其源所以潔其流本都院發貯府庫者澄其源也查前年修整本都院衙門以及鋪設等項布政司照例派九府屬銀壹千兩據詳每州縣出銀壹拾三兩名爲各官捐俸實則吾民剝膚署臨

桂縣事通判俞品督工侵漁一經行查水落石
出布政司追還千金賚繳本都院不問其是官
是民是捐是派立發桂林府貯庫確核給還然
亦信爲每州縣壹拾三兩也不意左州之民具
訴此項私派八十兩庭訊是實已將官僕與其
蠹胥奸里柳號示衆釋放之日會請司道府廳
州縣到院公訊其僕樊子祥與其蠹書李賢奸
里蒙京潘廷林閉上達當堂自認原派八十兩
交官不諱鞭責其僕餘免深究結案使自悔艾
所有貯庫銀一千兩若發給民有名無實行令
桂林府知府出具庫收備案以待修理日官自
支銷如有不肖官吏敢向里民再派事無微而
不彰本都院東方聞之定行咨究前罪并發爲
此示諭闔屬里民人等知悉本都院於私派加
徵實爲除革回首民艱行已入

告矣特示

曉諭本標左右營兵目示

康熙四十年二月

爲曉諭事照得武衙門無一不取諸兵所以歲
時年節生辰兩營將官呈送禮物槩不受查前
年臘月餽山羊二隻畜之講武場今并羊羔發
還臨行書此兩營將士應知予心特示

入境整飭軍紀檄

康熙三十八年九月

爲檄行整飭軍紀事照得撫標官兵壯聲靈而
資彈壓任綦重也先之以簡閱次之以訓練方
不負

朝廷建官設兵至意今本都院欽奉

特旨巡撫粵西擇於本月吉日蒞任所有本標左右

兩營馬步戰守兵丁及馬匹旗幟盔甲弓箭鎗
炮藤牌腰刀帳房等項悉照粘單屆期黎明先

于附城四里外寬大地方豎立營門左右分隊
步前馬後鎗手一行弓箭手一行籐牌一行大
刀一行炮手一行旗幟次第各安帳房聽本都
院經臨一一閱實隨進東門仍照左右排列至
轅門前伺候入院以彰紀律以肅軍容擬合行
知爲此檄行該中軍遊擊遵照施行

